

CONVENIO DE COLABORACIÓN ENTRE O SERVIZO GALEGO DE SAÚDE E A FEDERACIÓN DE ASOCIACIÓNS DE FAMILIARES E PERSOAS CON ENFERMIDADE MENTAL DE GALICIA (FEAFES GALICIA) PARA O DESENVOLVEMENTO DUNHA SERIE DE ACTIVIDADES DE FORMACIÓN, INFORMACIÓN E APOIO AOS ENFERMOS MENTAIS E AOS SEUS FAMILIARES E DO PROGRAMA “COIDAMOS DE TI”.

Santiago de Compostela, 13 de marzo de 2018

REUNIDOS:

DUNHA PARTE: Don Jesús Vázquez Almuiña, conselleiro de Sanidade e presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, de conformidade cos Decretos 41/2013 e 43/2013, do 21 de febreiro, polos que se establecen as estruturas orgánicas da Consellería de Sanidade e do Servizo Galego de Saúde, respectivamente; así como co establecido na Lei 1/2016, do 18 de xaneiro, de transparencia e bo goberno; na Lei 9/2007, do 13 de xuño, de subvencións de Galicia e polo Decreto 11/2009, do 8 de xaneiro, polo que se aproba o seu Regulamento; e na Lei 40/2015, de 1 de outubro, de Réxime Xurídico do Sector Público.

E DOUTRA: Don José Ramón Girón García con D.N.I. nº 33214346T, presidente da Federación de Asociacións de Familiares e Persoas con Enfermidade Mental de Galicia (FEAFES Galicia) con N.I.F. nº G-15545353 que actúa en nome e representación da mesma,

MANIFESTAN:

PRIMEIRO. Que o Servizo Galego de Saúde, organismo autónomo creado por Lei 1/1989 e adscrito á Consellería de Sanidade, ten atribuídas as competencias precisas para o desenvolvemento de tódalas áreas que configuran o concepto integral de saúde, xestionando a sanidade en tódalas súas facetas, de conformidade co previsto no Título VI da Lei 8/2008, do 10 de xullo, de saúde de Galicia.

SEGUNDO. Dentro do Servizo Galego de Saúde, a Subdirección xeral de Planificación e Programación Asistencial é a unidade administrativa a que se refire o artigo 3 do Decreto 389/1994, do 15 de decembro, polo que se regula a saúde mental en Galicia, encargada de xestionar os plans e programas de saúde mental da Comunidade Autónoma e coordinar os dispositivos dedicados á saúde mental.

TERCEIRO. Que no ámbito da nosa comunidade, a prevalencia do trastorno mental persistente e o modelo de atención na saúde mental, prioriza a atención na comunidade e a integración social do enfermo, debéndose levar a cabo programas de achegamento á poboación xeral, e en especial de non discriminación neste colectivo.

CUARTO. Que a Federación de Asociacións de Familiares e Persoas con Enfermidade Mental de Galicia é unha entidade que leva a cabo actividades de axuda e apoio ós enfermos mentais e ás súas familias, tendo como un dos seus fins a información, formación, divulgación e sensibilización social da poboación sobre esta enfermidade.

A Federación de Asociacións de Familiares e Persoas con Enfermidade Mental de Galicia (FEAFES Galicia) cumpre os requisitos para obter a condición de beneficiario recollidos no artigo 10 da Lei 9/2007, do 13 de xuño.

QUINTO. É por isto que ámbalas dúas partes consideran de particular importancia o establecemento de accións conxuntas promovendo a divulgación da enfermidade e dando a coñecer a importancia real que ten o problema de saúde e a integración social, así como o establecemento de programas de estadias de ocio ás persoas con enfermidade mental, e apoio aos seus coidadores, para os efectos de mellorar a calidade de vida destas persoas e dos seus familiares.

Por todo isto, formalizan este convenio de acordo coas seguintes

CLÁUSULAS:

PRIMEIRA. O presente Convenio ten por obxecto o desenvolvemento dunha serie de actividades no ámbito territorial de actuación da federación cos seguintes obxectivos:

- Formación continuada dos profesionais que traballan ou colaboran coas asociacións, mediante a asistencia a cursos, seminarios e congresos, das materias propias da súa competencia. Tamén está contemplada a posibilidade de realizar un Congreso para os profesionais e as persoas que integran as directivas das asociacións.
- Realización dunha xornada de sensibilización dirixida a pacientes, profesionais e cuidadores, nun marco formativo e divulgativo da enfermidade.
- Difusión de cuestións relacionadas coa atención e o coidado das persoas que padecen un trastorno mental persistente, a través de distintos medios.
- Mantemento e actualización dos contidos da páxina web da federación, onde se ofertará información útil para os enfermos e familiares en canto a recursos, centros, servizos, coidados, e especialmente da rede de atención a estes enfermos e aos seus familiares proporcionada polas asociacións integradas na federación.
- Mantemento do sistema de información e orientación a usuarios e asociacións, mediante unha atención personalizada a estes pacientes e aos seus familiares, e tamén ás asociacións que integran a federación, mediante apoio técnico e xurídico.
- Ofrecer un servizo de asesoramento xurídico a enfermos e familiares, en temas relacionados coa situación de enfermidade mental na que se atopan estas persoas, tales como incapacitación legal, nomeamento de tutor legal, e outros procesos xudiciais nos que poidan estar inmersos como consecuencia da súa enfermidade.
- Ofrecer un servizo continuado de estadías alternativas de ocio activo, “Programa Coidamos de Ti”, ás persoas con enfermidade mental, que sirva, á súa vez, de alivio da carga asistencial aos seus cuidadores non profesionais, cos seguintes obxectivos:
 - Ofrecer estadías aos usuarios para o caso de urxencias e/ou circunstancias especiais da familia.
 - Ofrecer aos usuarios programas personalizados de ocio activo normalizado que potencien a súa autonomía, habilidades sociais e condutas adaptativas.

SEGUNDA. A subvención obxecto deste convenio é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de

organismos internacionais, sen prexuízo do disposto no artigo 17.3 da Lei 9/2007, do 13 de xuño.

O importe da subvención, illadamente ou en concorrencia con outras subvencións, axudas ou ingresos non poderá superar o custo da actividade subvencionada.

TERCEIRA. A Federación comprométese a cumprir coas obrigas que o artigo 11 da Lei 9/2007, do 13 de xuño, de subvencións de Galicia esixe aos beneficiarios, e acepta ademais os seguintes compromisos:

a- Aceptar e colaborar coas medidas establecidas polo Servizo Galego de Saúde para comprobar o cumprimento do fin para o que se subscribe o presente convenio.

b- Cumprir as directrices e instrucións de coordinación e programación dispostas polo Servizo Galego de Saúde a través da Subdirección Xeral de Planificación e Programación Asistencial.

c- Remitir con periodicidade trimestral unha memoria na que se faga constar:

- 1) Breve descrición das actividades realizadas no marco do programa “Coidamos de ti” (data, lugar de realización, duración)
- 2) Número de beneficiarios directos e beneficiarios indirectos desagregado por xénero do programa “Coidamos de ti”.
- 3) Número de Actividades de formación continua realizadas polos profesionais que traballan ou colaboran coas asociacións que integran a federación: Asistencia a Cursos, Congresos, Xornadas ou Seminarios:
 - Organizados pola propia federación: data, denominación, programa, nº asistentes, localidade, ámbito, profesionais aos que vai dirixido, poñente/s e nº de asistentes.
 - Non organizados pola federación: nº profesionais becados, listaxe congresos asistidos (data, denominación, localidade, ámbito, ...).
 - Grado de participación dos profesionais en cada unha das anteriores actividades (docente, oínte)
- 4) Número e tipo de actividades de difusión e sensibilización da poboación xeral respecto aos trastornos mentais: cuñas de radio, mantemento e actualización páxina web (nº de visitas), redes sociais activas, publicacións de dípticos, folletos, guías, ...

(achegando a/as publicación/s), xornadas de sensibilización (data, lugar celebración, nº asistentes, duración...), charlas divulgativas, publicacións periódicas realizadas.

- 5) Número de persoas atendidas e de intervencións realizadas no servizo de información, orientación e asesoramento a pacientes e familiares e de asesoramento xurídico (desagregado por xénero).
- 6) Número e breve descrición de actividades e programas dirixidas a colectivos de maior vulnerabilidade (en especial menores, mulleres, senfogarismo e persoas con discapacidade).
- 7) Número de reunións de coordinación con outros servizos de atención a persoas con problemas de saúde mental.

CUARTA. Salvo que se xeren créditos adicionais co mesmo fin, o Servizo Galego de Saúde comprométese para levar a cabo o programa achegar a cantidade de oitenta e catro mil trescentos e sete euros (**84.307,00 €**) con cargo a aplicación orzamentaria **5001.413A.481.14**, co código de proxecto **201400028**, consignada nominativamente nos orzamentos xerais da Comunidade Autónoma de Galicia para o ano 2018.

QUINTA. No caso de que se xere créditos adicionais, tal como se especifica na cláusula anterior, elaborárase unha addenda para ampliación do presente convenio formalizando así o libramento da contía correspondente.

SEXTA. A contía indicada na cláusula cuarta farase efectiva do seguinte xeito:

Logo da sinatura do convenio, poderase efectuar un pago anticipado, segundo o artigo 63 do Decreto 11/2009, do 8 de xaneiro, achegando por parte da asociación:

- Unha memoria coa descrición do programa de actividades que se van realizar durante a vixencia do convenio e sempre que a actividade comezase previamente á sinatura do convenio, segundo se indica na terceira cláusula deste convenio.
- Certificado de non atoparse incurso en causas segundo artigo 10 da Lei 9/2007, do 13 de xuño.
- Certificado de obrigas tributarias e seguridade social.

- Copia cotexada do CIF
- Declaración responsable sobre a titularidade da conta bancaria onde se vai a realizar o ingreso.

Poderanse realizar pagamentos parciais até un máximo do 80% do importe total deste convenio (incluído o anticipo), a conta da liquidación definitiva e segundo se desenvolvan as actividades do programa, achegando orixinais ou copias compulsadas dos xustificantes de pagamento ocasionados polo desenvolvemento das actividades do programa, xunto cunha relación ordenada e detallada dos mesmos.

A data límite e improrrogable para presentar a solicitude e documentación dos pagamentos parciais será o 5 de novembro de 2018.

A porcentaxe restante da subvención non se fará efectiva até que estean integramente xustificadas a totalidade dos pagamentos correspondentes á actividade subvencionada.

De acordo co artigo 65.4 do Regulamento da Lei 9/2007, do 13 de xuño, os pagos anticipados e os pagos a conta quedan exonerados da constitución de garantía.

SÉTIMA. A xustificación final realizarase logo do cumprimento da finalidade e demais condicións deste convenio nos termos recollidos nos artigos 28, 29 e 30 da Lei 9/2007, do 13 de xuño, de subvencións de Galicia, así como no artigo 41 e 42 do Decreto 11/2009, do 8 de xaneiro, achegando a seguinte documentación:

- a) Orixinais ou copias compulsadas dos xustificantes de gastos ocasionados e pagos realizados no desenvolvemento das actividades do programa, xunto cunha relación ordenada e detallada dos mesmos.
- b) Declaración das actividades realizadas e financiadas con este convenio indicando o custo repercutido para a entidade.
- c) Certificación da Federación onde se faga constar que os gastos que se xustifican se ocasionaron no desenvolvemento de actividades obxecto deste convenio e que foron debidamente aboados.
- d) Declaración complementaria do conxunto das axudas solicitadas, tanto as aprobadas ou concedidas como as pendentes de resolución, para o mesmo

proxecto, das distintas administracións públicas competentes ou das súas entidades vinculadas ou dependentes.

1. Cando o importe dalgún xustificante non se impute totalmente á finalidade deste convenio indicárase a contía exacta daquel que resulte afectada polo mesmo.
2. Consideraranse gastos subvencionables os que cumpren os requisitos fixados polo artigo 29 da Lei 9/2007, do 13 de xuño e realizados no desenvolvemento do obxecto deste convenio. Para estes efectos, consideraranse gastos subvencionables os realizados dende o 1 de decembro do 2017 ata o 30 de novembro de 2018.

Tamén son subvencionables os gastos financeiros, de asesoría xurídica ou financeira, os gastos notariais e rexistrais e os gastos periciais para a realización do proxecto subvencionado e os de administración específicos directamente relacionados coa actividade subvencionada se son indispensables para a axeitada preparación ou execución da mesma, así como os gastos de garantía bancaria. Non obstante, en ningún caso serán subvencionables os xuros debedores das contas bancarias.

A xustificación dos gastos deberá presentarse con anterioridade ao 5 de decembro de 2018. De conformidade co artigo 29.2 da Lei 9/2007, do 13 de xuño, aos efectos deste convenio, considéranse gastos realizados os que foran efectivamente pagados con anterioridade á finalización do período de xustificación e aqueloutros gastos realizados e que por imperativo legal non se puideran ter pagado nese prazo.

3. As facturas deberán estar debidamente cubertas de acordo coa normativa vixente.
4. A documentación xustificativa dos gastos ocasionados e pagos realizados dirixirase á Subdirección Xeral de Planificación e Programación Asistencial, que emitirá informe favorable de ser conforme.
5. Serán causas de reintegro do importe total ou parcial do convenio as previstas no artigo 33 da Lei 9/2007, do 13 de xuño, de subvencións de Galicia, así como no artigo 74 e seguintes do Decreto 11/2009, do 8 de xaneiro.

OITAVA. Con data límite do 15 de xaneiro de 2019, a asociación deberá achegar á Subdirección Xeral de Planificación e Programación Asistencial unha memoria final sobre a totalidade das actividades obxecto deste convenio desenvolvidas ao longo do ano 2018, segundo o modelo que se xunta como Anexo a este convenio.

NOVENA. Para a remisión da documentación relativa a este convenio utilizarase a sede electrónica da Xunta de Galicia mediante a cumprimentación do procedemento electrónico denominado “PRESENTACIÓN ELECTRÓNICA DE SOLICITUDES, ESCRITOS E COMUNICACIÓNS QUE NON CONTÉN CUN SISTEMA ELECTRÓNICO ESPECÍFICO NIN CUN MODELO ELECTRÓNICO NORMALIZADO (PR004A), dirixíndoas a atención da Dirección xeral de Asistencia Sanitaria.

DÉCIMA. Constituirase unha comisión mixta paritaria para o seguimento e control do convenio, co obxecto de resolver as dúbidas que se presenten na súa interpretación e execución. Esta comisión estará composta por:

- Dous representantes do Servizo Galego de Saúde.
- Dous representantes da federación.

No suposto de desacordo entre as partes que compoñen esta comisión, a presidenta do Servizo Galego de Saúde será a competente para resolver as distintas cuestións que foran obxecto de diverxencia. A devandita resolución poderá ser impugnada ante a xurisdición contencioso-administrativa.

DÉCIMO PRIMEIRA. Este convenio ten natureza administrativa e rexerase polo disposto nas súas cláusulas e, no seu defecto, pola Lei 9/2007, do 13 de xuño, de subvencións de Galicia e polo Decreto 11/2009, do 8 de xaneiro, polo que se aproba o seu Regulamento, en todo o que non se opoña á lei.

DÉCIMO SEGUNDA. A subscrición deste convenio non comporta relación contractual ningunha do Servizo Galego de Saúde cos profesionais dependentes da Federación de Asociacións de Familiares e Persoas con Enfermidade Mental que realicen as actividades obxecto do mesmo, de tal xeito que por este concepto non se lle poderán esixir responsabilidades, nin directas nin subsidiarias, polos actos acaecidos no seu desenvolvemento.

DÉCIMA TERCEIRA. Respecto do réxime de infraccións e sancións haberá que aterse ao disposto no Título IV da Lei 9/2007, do 13 de xuño, de subvencións de Galicia. De conformidade co artigo 17 da Lei 1/2016, do 18 de xaneiro, de transparencia e bo goberno e

co previsto no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a Consellería de Sanidade dará publicidade deste convenio no Portal de Transparencia da Xunta de Galicia e no rexistro público de axudas, subvencións e convenios e incluírá no rexistro público de sancións aquelas que se puideran impoñer como consecuencia do seu desenvolvemento.

DÉCIMO CUARTA. A federación prestaralle colaboración e facilitaralle canta documentación sexa requirida, no exercicio das funcións de control, ao Servizo Galego de Saúde, á Intervención Xeral da Comunidade Autónoma, Tribunal de Contas, Consello de Contas, así como aos órganos que, de acordo coa normativa comunitaria, teñan atribuídas funcións de control financeiro. Así mesmo, deberá de cumprir o resto de obrigas que establece o artigo 11 da Lei 9/2007, do 13 de xuño, de subvencións de Galicia.

DÉCIMA QUINTA. O prazo de vixencia deste convenio será dende o día seguinte ao da súa sinatura até o 31 de decembro de 2018.

DÉCIMO SEXTA. Serán causas de resolución deste convenio:

- a) O incumprimento total ou parcial das súas cláusulas.
- b) O mutuo acordo entre as partes asinantes do mesmo.

Toda alteración das condicións tidas en conta para este convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais no suposto que a contía supere o custo da actividade subvencionada, poderá dar lugar á modificación do convenio.

E en proba de conformidade, asínase polas partes o presente convenio en cuadriplicado exemplar, no lugar e data indicados no encabezamento.

Polo Servizo Galego de Saúde

Pola Federación de Asociacións de
Familiares e Persoas con Enfermidade
Mental de Galicia

Jesús Vázquez Almuiña

José Ramón Girón García

ANEXO

MEMORIA FINAL

1. Datos básicos da entidade, organigrama, e Asociacións que a compoñen (indicando nome da asociación, o seu representante e localización).
2. Cadro de persoal: especificar cada unha das persoas que colaboren coa asociación, indicando o nome, NIF, horas semanais traballadas (diferenciando entre horas asistenciais e de xestión se son clínicos), posto desempregado, titulación académica, salario mensual sen complementos, trienios, retribucións complementarias, tipo de contrato.
3. Balance de ingresos e gastos da Federación.
4. Informe que inclúa tódalas axudas solicitadas, outorgadas ou non por outras administracións ou entes públicos e privados, nacionais ou internacionais, para o mesmo programa obxecto deste convenio.
5. Actividades Realizadas:
 - Número de reunións de coordinación con dispositivos da rede de saúde mental.
 - Programas sanitarios e psicosociais: data, denominación, descrición, poboación diana e poboación acadada se procede.
 - Horario de atención ao público.
 - Servizo de información, orientación e asesoramento a pacientes e familiares (nº de entrevistas desagregada por xénero).
 - Servizo de asesoramento xurídico (horario e nº de entrevistas desagregada por xénero).
 - Actividades do Programa Coidamos de Ti:
 - Actividades desenvolvidas e cronograma das mesmas
 - Número de beneficiarios directos en cada actividade. (por xénero)
 - Número de beneficiarios indirectos en cada actividade.
6. Reclamacións presentadas polos usuarios: xuntar copia de tódalas reclamacións achegadas polos usuarios no libro de reclamacións e as respostas ás ditas reclamacións.
7. Cubrir as fichas de indicadores remitidas dende a Subdirección Xeral de Planificación e Programación Asistencial.

NÓMINAS

Nº Orde	Nome e apelidos	Categoría profesional	Mes-año	Importe líquido	% Imputado	Importe imputado	Data de pago
						0.00 €	

IRPF

Nº Orde	Nome e apelidos	Categoría profesional	Mes-año	IRPF	% Imputado	Importe imputado	Data de pago
						0.00 €	

SEGURIDADE SOCIAL

[illegible]

